



11. august 2010

UKA 2010/36

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqummiuppara:

Arnat angutillu naligiissitaanissaat pillugu Inatsisartut inatsisaat nr. 7, 11. april 2003-meersoq allangortinneqassasoq pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut siulersuisuni, sinniisutut aallartitaqarfinni imaluunniit ataatsimoorussamik aqutsisoqarfinni ilaasortassanik toqqaalernermit arnat angutillu naligiimmik Naalakkersuisunit toqqarneqartalernissaat qulakkeerneqaqullugu.

(Inatsisartunut ilaasortaq Naaja Nathanielsen, Inuit Ataqatigiit)

Tungavilersuut

Demokrati tungavigalugu ingerlasuni innuttaasut tamarmik assigiimmik periarfissaqarput assigiimillu ataqineqassallutik. Demokratimik tungaveqarneq ilaatigut taamaammat assigiingitsisitsisoqannginnissamik aamma siunertaqarpoq.

Taamaattumik Kalaallit Nunaat naligiissitaanermut inatsiseqarpoq. Inatsisip siunertarivaa arnat angutillu assigiimmik sunniuteqarsinnaanerisa inuiaqatigiinnilu atuuffinni tamani naligiimmik periarfissaqarnissaasa qulakkeerneqarnissaat.

Inatsimmi § 6-imi aalajangersaq malillugu siulersuisuni, ataatsimiititaliani, sinniisuutitaqarfinni ataatsimiititaliarsuarnilu Naalakkersuisut ivertitaanni ”sapinngisamik” ilaasortat angutit arnallu amerlaqatigiissinniarneqassapput.

Tamanna aamma suliffeqarfinnut imminut pigisunut, soqutigisaqatigiiffinnut, aktieselskabinut anpartsselskabinullu Nunatta karsianit annermik aningaasalersorneqartunut imaluunniit annermik piginneqatigiissutigineqartunut atuuppoq. Oqariaaseq ”*sapinngisamik*” isumaga naapertorlugu ersernerluppoq inatsisillu siunertamisut atorneqarnissaanut akimuulluni.

Siunnersuutip matuma siulersuisuni arnat amerlanerulernissaat qulakkiissavaa, aammali siunisami angutit immikkoortinneqannginnissaannik qulakkeerinnissalluni. Siunnersuut akuerineqassappat tamatuma kingunerissavaa tamatigut pingasunik ilaasortassanik toqqaasoqassatillugu ikinnerpaamik ataatsip arnaasarnissaanik (imaluunniit angutaanissaanik) aammalu tallimanik ilaasortassanik toqqaasoqassatillugu ikinnerpaamik marluk arnaasarnissaannik, il.il.

Isummat allangortinneqarnissaannut imaaluunniit pissutsit aalajangersimasut siuarsarneqarnissaannut inatsisiliuussineq naliginnaasuvoq. Pisamilu uani inatsimmi pioreersumi Kalaallit Nunaanni arnat inuiaqatigiinni peqataanissaannut sunniuteqarnissaannullu periarfissat pitsanngorsarlugit sukaterneqassasut qinnutigivara.

Sungiusimasat maliinnarlugit isumaliortaaseqarnerup imaluunniit attaveqarfiit matoqqanerisa kingunerisaannik ullumikkut arnat atorluarneqanngitsut akornanni, piginnaaneqarluartunik arnarpassuaqartoq upperivara.

Misissuinerpassuit takutippaat ingerlatsiviit ingerlanneqarneranni arnat angutillu amerlaqatigiis-sikkaanni tamanna aningaasaqarnermut pitsaasunik sunniuttartoq. Tassunga patsisaatinneqarpoq akuleriissitaarneq ineriartortitsinissamut pitsaasunik tunngavissaqartitsisartoq aalajangiiniarnernilu silinnerusunik periarfissiisartoq.

Siunnersuutip matuma piareersarnerani pisortat aktieselskabiini aqutsisoqarfiit siulersuisullu ukiuni kingullerni 25-ni angutinut arnanullu qanoq aggutaarsimanagerat misissorsimavara. Ingerlatsiviit 15-it akornanni arfinillit arnanik siulersuisunut ilaasortaqaarniarnerminnut ukiut qulit amerlanerilluunniit atorsimavaat. Ingerlatsivik ataaseq naak ukiuni aqqaneq-marlunni atareersimalluni arnartaqartitsisimangilaq.

Siulersuisuni assigiinngitsuni arnat akuunerulersinneqarnissaat taamaammatt kigaappallaarujusuarsimavoq. Maluginiagaq soqutiginarloq alla tassaavoq ukiut ingerlanerini siulersuisuni assigiinngitsuni atit taakkuujuartut takussaammata. Tassa imaappoq angutit aalajangersimasuinnaat siuler-suisuni assigiinngitsuni annertuallaamik atorneqartarsimasut. Taamaattumik aamma siulersuisuni nukit nutaat misilittagaqaleqqullugit kinguaariitsigut nikittoqarnissaa pisariaqalerpoq.

Ullumikkut pisortat aktieselskabiutaanni siulersuisunut ilaasortat taamaallaat 26 %-ii arnaapput. Nukit tamaasa atorfissaqartippagut, tamannalu siunnersuummi matumani tamanut iluaqutaasusamik naqissuserneqarlunilu taparserneqarpoq.